



ՀԱՂՈՐԴԱԳՐՈՒԹՅՈՒՆ

Ամենայն Հայոց կաթողիկոս Տ. Տ. Վազգեն Ա Հայրապետը տարվույս 20 փետրվարին հղել է ուղերձներ, գեղազիր հատուկ կոնդակներով՝

1. Նորին Վեհափառություն Հուսեն Բ թագավորին՝ Հորդանանի,
 2. Վսեմաշուք նախագահ Հաֆեզ Ասատին Սիրիայի Հանրապետության,
 3. Վսեմաշուք նախագահ Ամին Ճեմայելին Լիբանանի Հանրապետության,
 4. Վսեմաշուք նախագահ Սատտամ Հուսեյնին Իրաքի Հանրապետության,
- հետևյալ բովանդակությամբ՝

«Գուհություն Աստուծո ամենակալին, որ պատեհությունը ունենք հայ ազգի հավատքի կենտրոն բազմադարյան Ս. Էջմիածնից, օրհնությամբ Մեր այս ուղերձը առաքելու Ձերդ Գերազանցության, իմաստուն և քաջարի նախագահիդ:

Այս պատեհությունը Մեզ ընծայում է ողբերգական հիշատակը Հայ Եկեղեցու և ժողովրդի մոտ երկու միլիոն զավակների նահատակության, որի յոթանասունամյա տարեկիցը ոգեկոչելու են աշխարհի բոլոր հայերը, որ ի Սովետական Հայաստան և որ ի սփյուռս աշխարհի, առաջիկա 24 ապրիլին:

Սգո և աղոթքի այս սրբազան պահին, Հայ Եկեղեցին ու ժողովուրդը չեն կարող մոռանալ այն մարդասիրական վերաբերմունքը, որ այնքան մեծահոգությամբ ցուցաբերեցին Ձեր երկիրը և հայապաշտպան արաբ ազնիվ ժողովուրդը բազմահազար թշվառ հայերի նկատմամբ, որոնք վերապրողներն էին Օսմանյան կառավարության կողմից 1915 թվականին կազմակերպված ցեղասպանության, որին կոչ գնաց ամբողջ հայ ազգաբնակչությունը Արևմտյան Հայաստանի: Նահատակված մեր անմեղ զավակներից վերապրողները, մեծ մասամբ որբեր, արաբ ազնիվ ժողովրդի ծոցով գտան՝ ապահով ու խաղաղ ապաստան, եղբայրական հոգատարություն և ամեն ազատություն ապրելու և կազմակերպելու իրենց համայնքային եկեղեցական կյանքը, կրթական ու մշակութային հարակից հիմնարկություններով, մնալով հավատարիմ ու շինարար քաղաքացիները իրենց նոր հայրենիքի:

Ցեղասպանության ճիրաններից ազատված տասնյակ հազար հայ ընտանիքներ, 1915-ից հետո ապաստան գտան նաև Արևելյան Հայաստանում, որ այսօր ապրում և զարգանում է փրկված հայ ժողովրդի մայր զանգվածը Սովետական Հայկական Հանրապետության հովանու ներքո, խաղաղ ու ապահով:

Հայ Եկեղեցին և համայն հայ ժողովուրդը, սկսած Սովետական Հայաստանից մինչև աշխարհի բոլոր հորիզոնները, ուր մի հայ մարդու սիրտ է բաբախում, այսօր անհուն երախտագիտությամբ հիշում են Ձեր երկիրը և արաբ ապսվահոգի ժողովրդին, ու Մեր միջոցով նրանք բոլորը Ձերդ Գերազանցության են ներկայացնում իրենց խորազգաց շնորհակալությունը և աղոթում, որ բարին Աստված միշտ պահապան ու մարտակից մնա Ձեզ և Ձեր երկրին ու հավետ պահպանի այն խաղաղության, հառաջդիմության և ծաղկման մեջ, իրականացումովը արաբ ազգի բոլոր արդար իդեալների:

Թույլ տվեք, վսեմաշուք Տիար Նախագահ, Մեր այս ուղերձով բերել նաև անձամբ Ձեզ Մեր ջերմագին բարի մաղթանքները Ձեր արևշատության և Ձեր իմաստուն իրազրծումների ամրապնդման համար, ավելի ու ավելի ճառագայթումովը Ձեր հեղինակության միջազգային կյանքում:

Օրհնություն և փառք Ձեր մեծ հայրենիքին»:

ԴԻՎԱՆ ՄԱՅՐ ԱԹՈՌԻ

Ս. Էջմիածին,

22 փետրվար 1985 թ.

